

Cambio di ley electoral proponi ta mustra complica

Cambio di Constitucion necesario pa algun punto

Tin un propuesta di ley riba mesa, di parlamento di Accion 21, Miguel Mansur, pa haci varios cambio den nos ley di eleccion. Cambio cu no solamente lo causa debate entre e partidonan politico, pero probablemente den opinion publico tambe. Nos impresion ta cu e cambionan proponi ta mas complica cu loke ta parce a primera vista y den cierto caso ta requeri cambio di Constitucion tambe.

Un di e temanan cu probablemente hopi discusion ta pa laga persona Arubano den exterior vota den eleccion na Aruba. Porcierto un tema cu a discuti caba tempo a traha nos Constitucion. E articulo III.5.1, relevante aki, ta bisa: "E miembronan di Staten ta ser elegi directamente ("rechtstreeks") pa e ciudadanonan residencia na Aruba, cu ta Hulandes y a alcanza edad di diesocho aña."

Den e aclaracion di Constitucion ta bisa lo siguiente tocante derecho voto di ciudadano Arubano den exterior: "Den e revision di e Constitucion (di Hulanda; red.) relaciona cu derecho di voto, e exigencia di residencia en principio a keda elimina. Nos a inclui e exigencia aki di residencia explicitamente akiden. Ta imaginable pa duna Hulandes naci na Aruba, cu ta biba pafor di Aruba, tambe derecho di voto; pero localiza tal votadornan pafor di Aruba lo ocasiona, pa un aparato publico manera di nos, problema insuperable. Ademá ta surgi e pregunta si e Hulandesnan ey di origen Arubano, cu ta biba pafor di Aruba, lo por keda mantene nan mes



continuamente na altura di e desaroyonan politico di actualidad na Aruba, pa nan por ta capaz di haci un escogencia responsable."

Mester constata aki cu tin e exigencia den Constitucion, cu ta e ciudadano Hulandes, residencia na Aruba y di e edad correspondiente, tin derecho di voto den eleccion. Esaki sin mas ta exige anto un cambio di Constitucion pa por inclui persona cu a nace na Aruba, ta di nacionalidad Hulandes y cu no ta residencia na Aruba. Segun nos opinion, no ta posible pa introduci e derecho di voto pa e Arubano den exterior, si no ta via un cambio di Constitucion mes. Si e actual propuesta no ta pa cambia Constitucion mes, anto e cambio proponi no ta posible via e ordenanza ordinario.

E parti aki di nos Constitu-

cion ta obliga nos contempla tambe otro aspecto, cual ta e propuesta pa institui un tipo di 'eleccion primario' manera Corsou a introduci, cu ta toca e punto di "eleccion directo". E articulo menciona ariba ta bisa den e texto na Hulandes cu ta trata di "rechtstreekse" verkiezingen. E punto pa tuma na cuenta aki ta cu Hulanda conoce e sistema di eleccion indirecto ('getrapt'), por ehemplo den eleccion di e miembronan di Eerste Kamer.

E debate cu por surgi aki tambe ta si un eleccion den dos fase, esta un eleccion preliminar, despues di cual cierto partido(nan) so ta sigui pa eleccion, por ser considera un tipo di eleccion 'no directo', algo cu nos Constitucion talvez no ta permiti. Esey ta un parti di e discusion cu por tuma lugar. Sin embargo, nos lo tin tambe e discusion

kico ta propone cu e 'eleccion primario' aki? E idea ta pa mantene e sistema di cualificacion pa eleccion a traves di e minimo di firma di ciudadano, cu un partido mester logra pa por participa? Na Corsou e sistema di eleccion primaria no a elimina e sistema di apoyo via ciudadano cu ta firma pa esey.

Den nan sistema e eleccion primario ta sirbi como 'filter' pa evita cu tin demasiado partido ta participa, cu finalmente pa gran parti no

ta logra representacion den Staten. Pero, tambe tin e exigencia cu e partidonan tin cu cumpli cu e exigencia di un apoyo ciudadano, via firma, di por lo menos 1% di e total di voto valido di e anterior eleccion. Como ehemplo: den eleccion di 2021 tabatin 24 partido (grupo) politico cu a registra pa eleccion. Di esakinan 16 partido a participa na eleccion primario na januari 2021, y seguidamente 8 partido a continua pa eleccion na maart 2021. Finalmente, a 'corta paso' di 16 partido cu no por a bay eleccion.

Ademas, tin un otro asunto pa tuma na cuenta ora ta referi na e ehemplo di Corsou. E isla ey, contrario na Aruba, no tin e exigencia cu un partido mester ta un 'vereniging' (asociacion), un persona huridico legalmente constitui. Den nan sistema e partido politico ta un grupo di ciudadano cu mesun pensamiento. Esaki ta haci cu ta hopi mas facil pa lanta un partido politico na Corsou cu na Aruba. Esaki ta lanta e pregunta si na Aruba mester di un 'filter doble' manera Corsou tin, di tanto e lista di ciudadano cu ta firma como base di apoyo, como e eleccion primario su tras.

E propuesta di ley di iniciativa aki ta contene mas parti, cu nos lo trata den otro articulo.

